

Uunga siunnersuut: Siusinaartumik pensionisiat pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2020-imeersoq

(Qulaajaanerit, piginnaangorsaqqiinerit, najukkani pissutsit pissutigalugit tapiissuteqartitsigallernerit aamma Siusinaartumik pensionisiaqarnermut maalaaruteqartarfimmut maalaaruteqarsinnaaneq pillugu erseqqissaaneq)
(Isumaginninnermut, Ilaqutariinnut Inatsisinillu Atuutsitsinnermut Naalakkersuisoq)

Saqqummiussissut

(Isumaginninnermut, Ilaqutariinnut Inatsisinillu Atuutsitsinnermut Naalakkersuisoq)

Siullermeerneqarnera

Siusinaartumik pensionisiat pillugit Inatsisartut inatsisaata allanngortinneqarnissaa pillugu Inatsisartut inatsisissaattut siunnersuut matumuuna Naalakkersuisut saqqummiuppaat.

Siusinaartumik pensionisianut suliassaqarfik inuiaqatigiinni pingaaruteqartorujussuusoq Naalakkersuisut ilisimavaat. Taamaattumik erseqqissaatigissavara suliassaqarfimmi nalilersuineq attuumassuteqartumillu tusarniaaffigineqartunit akissutit tunngavigalugit inatsisissamik piareersaarnermik suliaqarneq piaarnerpaamik aallartissasoq, taamaaliornikkut malittarisassat maannamut atuuttut aaqqiiffigineqassammata.

Tamatuma pinissaata tungaanut tigussaasunik arlalinnik unammilligassaqarpoq siunnersuut manna aqputigalugu aaqqinneqarsinnaasunik, innuttaasunut iluaqutaasussanik. Siunnersuummi matumani taamaallaat pineqartut tassaapput suliniutit, aalajangersakkanit maannakkut atuuttunit, innuttaasunut pitsaanerusumik inissisimalersitsisut.

Siusinaartumik pensionisiaqarneq pillugu maalaarutiniq suliaqarsinnaanermut Siusinaartumik pensionisiaqarnermut maalaaruteqartarfiup piginnaatinneqarneranik, aamma qulaajaanerit ingerlanneqarneranut erseqqissaaneq kiisalu siusinaartumik pensionisianik qinnuteqarnermi piginnaangorsaqqinnerup ingerlanneqartarnera pillugit erseqqissaaneq siunnersuummi tunuliaqutaapput.

Siusinaartumik pensionisiat pillugit maalaarutiniq suliarinnittarnermi piginnaatitsinerup agguarneqarnera piuminarnerusoq ersarinnerusorlu siunnersuutikkut qulakkeerseqqissaq.

Siunnersuummi siunertarineqartoq alla tassaavoq siusinaartumik pensionisiallit ilatsiinnarluni pilersugaanermut taarsiullugu sulisinnaassutsiminnik atorluaasinnaanerannut namminnerlu aningaasarsiaqarsinnaanerannut periarfissat patajaallisaavigineqarnerat.

Siusinaartumik pensionisiaqarnissamik qinnuteqartut tamarmik sulisinnaassutsip ineriartortinnissaanut piginnaangorsaqqinnermik ingerlatsissasut Siusinaartumik pensionisiat pillugit Inatsisartut inatsisaanni atuuttumi aalajangersakkani siunertaavoq. Tassani pineqanngitsut tassaapput innuttaasut ersarissumik sulisinnaassuseqanngitsut, sulisinnaassutsiminnillu ineriartortitsisinnaanngitsut.

Taamaattorli arlaqartunik innuttaasoqarpoq piffissap ingerlanerani sulisinnaassutsiminnik ineriartortitsisinnaasunik, qulaajaanerulli ingerlanerata nalaani piginnaangorsaqqinnermik

ingerlatsinissap aallartinnissaanut iluaqutissinneqarsinnaangitsunik. Innuttaasunut arlaqartunut taakkununga malittarisassat atuuttut nassuiaatigineqarnerat aallaqqaammut siunertarineqartumut naapertuussimanngilaq.

Taamaalilluni innuttaasunut arlaqartunut taakkununga piginnaangorsaqqinnermik ingerlatsinissap kinguartinneqarallartarnissaa, aamma innuttaasut arlaqartut taakku sulisinnaassusiat ukiumoortumik nalileqqinneqartassasoq siunnersuummi matumani erseqqissarneqarpoq, taamaalilluni piginnaangorsaqqinnermik ingerlatsinissamut aallartissinnaanersut ingerlaavartumik nalilersorneqartassaaq.

Taamaattumik pisumi piffissaq ungasinnerusoq eqqarsaatigalugu sulisinnaassutsiminnik ineriartortitsinissamut periarfissaqarfigisinnaasaanni, piffissamili pineqartumi qulaajaanermik ingerlatsinermi piginnaangorsaqqinnermut ingerlatsinissamik aallartitsinissaminnut iluaqutissinneqarsinnaangiffianni, innuttaasut sulisinnaassuseqanngitsut sulisinnaassutsiminnillu ineriartortitsinnaangitsut naligalugit qinnuteqartut sullinneqarnissaannut siunnersuut manna ikiutaassaaq.

Paarlattuanik piginnaangorsaqqinneqarnissamik peqataatinneqanngikkallarnermikkut imminut pissutsit pillugit erseqqissaavigineqassapput, kiisalu aallaqqaammut siunertarineqartoq naapertorlugu ataasiakkaat ineriartorsinnaanerminnik periarfissatik pillugit ingerlaavartumik nalilersuiffigineqartassallutik.

Taamaalillutik innuttaasumut namminermut inuiaqatigiinnullumi iluaqutaasumik eqeersimaarnerusumik imminut pilersornissaq innuttaasut taakku piffissaq ungasinnerusoq eqqarsaatigalugu angusinnaangussavaat.

Siusinaartumik pensionisiaqartitsisarneq nalilersuiffigineqaaqqammerpoq nalilersuinerullu taassuma takutimmagu inatsimmi arlalinnik allanngortitsisoqarnissaa pisariaqartinneqartoq naggataatigut erseqqissaatigeqqissavara. Siunnersuut manna siusinaartumik pensionisiaqartitsinermut suliassaqarfinni iluarsaassinermi siullertut suliniutaavoq. Siusinaartumik pensionisiaqartitsinermut suliassaqarfiup iluarsaassiffigineqarnerani Ilaqutariinnermut Peqqissutsimullu Ataatsimiititaliap pitsaasumik suleqatiginissaa qilanaaraara.

Taamatut oqaaseqarlunga immikkoortoq Inatsisartunut oqaluuserisassanngortippara.